

XCII

1327-VII-20, Ayamonte. Albalá de Alfonso XI al concejo de Murcia, notificando la imposibilidad de atender a las demandas concejiles hasta que no cesasen las hostilidades con Granada. (A. M.M. C.R. 1314-1344, f. 31r).

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo de la çibdat de Murçia, salud et graçia.

Fago uos saber que vi las cartas que uos et Pedro Lopez de Ayala me enbiastes et vi todas las razones et las maneras que por ellas me enbiastes dezir.

Et a lo que me enbiastes dezir en razon de lo de Pedro Lopez. Sabet que le mande librar las terçias del regno de Murçia.

Et quanto en fecho de las otras cosas que uos et el me enbiastes dezir, yo esto aca en tierra de moros, en seruiçio de Dios et mio, et tengo muchas cosas de librar aca que me cunple, et despues que Dios quiera que daqui salga et torne a esto et a otras muchas cosas que tengo de librar, yo lo librare en aquella manera que mas mio seruiçio fuere.

Dada en Aymon, XX dias de julio, era de mill et trezientos et sesenta et çinco annos. Yo, Pedro Ruyz, de la camara, la fiz escreuir por mandado del rey.

XCIII

1327-VII-26, Torre Alhaquin. Provisión real de Alfonso XI al concejo de Lorca. Ordenando que prosiguiesen la guerra contra Granada y no acatasen la tregua pactada por don Juan Manuel. (A.M.M. C.R. 1314-1344, f. 31r).

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo de Lorca, salut et graçia.

Bien sabedes en commo uos enbie mandar por mi carta que feziesedes guerra a los moros lo mas afincadamente que podiesedes et que fiziesedes por Pedro Lopez de Ayala, mio vasallo, asy commo por el mi cuerpo mesmo en todas las cosas que mio seruiçio fuesen. Et agora dexieronme que ay algunos en Lorca que an destoruado et destoruan que non fagades guerra, et esto que lo fazen por

